

«Alpiq venda la forza idraulica per evitar il bancrut»

Il concern less era sa deliberar da sias ovrar nuclearas

CUN STEFAN ENGLER HA DISCURRI
CLAUDIA CADRUVI / ANR

■ **Alpiq less statalisar sias ovrar atomaras che na rendan betg pli. Il concern d'energia ha incumbensà ina firma da PR per planisar co influenzer ed instrumentalisar politichers e schurnalists per cuntanscher questa finamira.** Il glindesdi ha la «Basler Zeitung» ed ier il «Tages-Anzeiger» fatg public ils detagls dal plan. Las duas gasettas han survegnì en maun il palpìri strategic da la firma da PR che descriva manidlamman co ch'ins po volver l'opiniun publica per che Alpiq po sa deliberar da sias ovrar atomaras ch'èn mo pli in burdi finanziar.

Tge schais Vos da quest palpìri che mussa las strategias clandestinas dad Alpiq?

Stefan Engler: Igl è extrem penibel che questa infurmaziun chatta la via en la publicitad entras lobists ch'èn ensasez incumbensads dad Alpiq. Era per ils parlamentarar pertutgads n'èsi betg gist empernaivel.

Ma funcziuneschi uschia sco descrit en il palpìri?

Tgunsch èsi schon la moda co ch'i funcziuna davos las culissas: che politichers survegnan incumbensas da firmas che vulan mo promover l'agen interess. Quai n'ha da far nagut pli cun l'interess da la communitad.

Il palpìri mussa cun tge rampins ch'ins less statalisar las ovrar atomaras. Tge schais Vos dals plans?

Questas interpresas han gudagnà onns ora blers daners. Uss vai per la dumonda co serrar las ovrar e co dismetter il material. Quests custs na pon ins uss betg simplamain socialisar sin donn e cust da l'entira societad.

Als sanesters dian che las interpresas che possedan ovrar atomaras tutgian gea tuttna als chantuns ed a las citads. Ma i dat là gea era acziunaris privats.



Gea, quai ves'jau era uschia. En emprima lingia èsi en l'avegnir la chaussa dals acziunaris dad ir enturn cun quest problem. In auter problem è: Sch'il stadi na sa tegna betg vi da las lubientschas e concessiuns ch'el ha dà ina giada, ristga el da survegnir sumegliants problems sco uss la Germania ch'è confruntada cun plants pervi da la sortida atomara. Ins sto perquai sa tegnair vi da las concessiuns e garantir la segirtad da las ovrar enfin che las concessiuns curran giu.

Onns a la lunga han las interpresas d'energia pretendì ch'il stadi na duai betg sa maschadar en.

Quai è uschia. Bliers onns han ins vulì tegnair il stadi uschè lunsch davent sco pussaivel da la fiera d'electricitad. Per il mument pari da crescer custs ed uss fiss il stadi bun da sorprendere ovrar. Quai n'è nagina soluziun.

Alpiq less era vender 49 pertschient da ses portfolio d'ovrar idraulicas. Sche

las trais ovrar grischunas – Zervreila, Rain posteriur ed Engiadina – sa chattan en quest portfolio na tradescha l'interpresa betg. Savais Vos dapli?

Na, jau na sai betg dapli. Tuttas ovrar idraulicas da l'interpresa vegnan en dumonda. Alpiq possedevea gea era in grond pachet d'acziar da Repower che l'interpresa ha gia vendì al Grischun ed a l'Axpo. Uss pens jau ch'ins tshertga era cumpraders per las participaziuns da l'ovra Rain posteriur e da l'ovra da Zervreila. Ma senza enconuscher detagls, per exempel davart dretgs da precumpra d'acziunaris existents, èsi grev da specular, tgi che pudess vulair cumprare participaziuns.

Ed en general: Tge pensais Vos da vendita a la svelta?

Quai è «acziunaris». L'interpresa sa chatta en las stretgas cun sia liquiditad. Quai dentant betg pervi da las ovrar idraulicas! Uss è il concern sfurzà da vender l'uschenumnà «Tafelsilber» per evitar il bancrut.

Duess il chantun Grischun cumprare tschertas participaziuns che Alpiq fa amogna?

Da vender participaziuns n'è uss betg in bun mument. Ma da cumprare? Per gliez basegni in'analisa dals ristgs ed ins sto savair sch'ins è pront e bun da purtar quels. En il Grischun han ins fin uss adina partì ils ristgs tranter stadi ed investurs privats. Cun las ovrar da partenadi han ins chattà ina buna soluziun.

Ma fissi in'opziun ch'il Grischun cumprass dapli participaziuns?

Il chantun posseda per il mument mo 20 pertschient da las acziar da tuttas ovrar idraulicas sin l'intschess dal Grischun. Il rest tutga ad investurs u chantuns da la Bassa. I duvrass in'acceptanza politica, sch'ins less investir dapli en ovrar idraulicas sut las circumstanzas che regian da preschent.

La vista socialdemocrata, il stadi duai agir

«Jau di dapli onns che las ovrar atomaras èn in enorm problem economic per noss pajais», s'exprima *Silva Semadeni* (ps/GR). «La confederaziun vegn a stuair surpigliar ils custs per serrar las ovrar e dismetter ils ruments atomars.» Quai prescrivia la lescha d'energia nucleara. Las difficultads dad Alpiq mussian ch'ins stoppia chattar ina schliaziun uschè prest sco pussaivel. «Uss è para il mument per discurre seriusamain surlonder», di la cussegliera naziunala. «Nagin na vul cumprare ovrar atomaras. Ch'il stadi sto giugar ina rolla ma para perquai cler.» Impurtant saja da serrar uschè svelto sco pussaivel las ovrar pli privlusas e nunrentablas, pertge entras la surproduziun actuala d'energia vegnia era la forza idraulica sut squitsch.

A lunga vista rendi dentant da posseder ovrar idraulicas. Ellas vegnan puspè a survegnir lur valita cura che la fiera d'electricitad funcziuna puspè. La taxa sin CO2 engrevgescha en l'avegnir l'energia d'ovrar da charvun, gas u ieli. Sche quest'energia daventa pli chara, sa meglirescha la situaziun per la forza d'aua. A lunga vista èsi meglier da salvar las acziar d'ovrar idraulicas che da pattar las participaziuns sin la fiera.

Ma Alpiq vul u sto vender. Il privel exista che acziunaris da l'exteriur – da la China u da la Frantscha – sa patruveschan da las ovrar idraulicas.

Il privel exista. Qua han ils investurs svizzers, che pon sa lubir d'investir a lunga vista, da tegnair en egl la chaussa e da prender la chaschun e cumprare participaziuns. Il mender fiss sche la forza idraulica svizra vegness vendida en l'Asia. A lunga vista fissi ina catastrofa per noss pajais, sch'ins dess or da maun questa resursa.